

यूहन्नाए छीनीकाव ओसरो चिथी

आव चिथी येसुए उसिस यूहन्नाए ओसरो ज़। आल नेब्लो मिंनी नियेन सरैःसिउ लिज़्या। तोबो गायस यादोज़्यावए ओयेन ओसत ल्यो, उयुं ग़ालो रैःज्या (३ यूहन्ना १-६)। फरी तोबो दियोत्रिफस यादोज़्यावए ओयेन ते ओसत माल्यो, स०व रैःज्या (९-१०)।

1 डा इताव सेर्द लिज़्याव लोम्बा यूहन्नाए ल्योनी नँ डायुंलाव गायसलाई आव चिथी परींद डाईज्या। डा नँलाई साचो मया डादींज्या।

नँलाई रैःद ड़ासुनी च्याँःसिउ ज़ लिज़्या

2 ड़ायुंलाव ड़ानै, परमेस्वरए ल्योदा किताव नयुं चाव उलिज़्याव, हिताव ज़ नक्यारं गराँव ओताक, प्राईनी ज़ धोल पोगोल ओजैनिउक लिद परमेस्वरलाई पोंखारिउ ज़ ड़ानैज्या। 3 दाज्यु भाइर ननी याहुक परमेस्वरए ओपाँत नँ थ०रिद सतस नदोज़्याव डाथैक बनै खुसी डाताके। 4 परमेस्वरए ओपाँताव ड़ाराजमैव नँ स्यासो ड़ाज़ार परमेस्वरए ओपाँत याबाज्याव डाथैक ड़ासुनी च्याँःसिउ ज़ लिज़्या।

5 नँ ड़ायुंलाव ड़ानै, यायुं हुबोरालाई नरासमारिक युं हुबो येन नदोज़्या। परमेस्वरए ओपाँताव आदा होदा बारिज़्याव मासरेस्सिउराए जूनी नदोज़्याव येन झन ज़ चाव लिज़्या। 6 नोराए मन्दलीए ओडाक नमिन हाइद 'चाव येन दोज्याव' लिद गोहाई एज्यार। निताव आदा होदा बारिज़्यावरालाई परमेस्वरए ओपैज्याव मिताव माथैव मायोःवल सयोःद्याद येमत चावस नरापरीकिन ताखेहो है ड़ालिज़्या। 7 निताव मिंराए यायुं माहुबोरास काता ज़ मानिद ख्रीसए उमिन सथैन्याए जूनी आदा होदा लिज़्यार। 8 है ज़ैद गे नितावरालाई चिऊव ज़ परिज़्या। हो ताकिन ची गे ब

नोरस साचो पाँ सथैन्यात सिप ज़ गेताज़्या।

घेप्पा जैसिउ पैज़्याव दियोत्रिफस

9आवकिन डादा नडाव मन्दलीलाई तोबो चिथी परींद डायो। खाली जेडैताव जैसिउ पैज़्याव दियोत्रिफसए डापाँ माभैःके। 10 डा जेल्योक हुव डादैकिन नोए ओयेन भरी प्राइँराए डाक सतैँघान्या डाले। नोए माचाव पाँर गेडैत झाःघासिज़्याव। ओल इन निताव येनत उयुँ सोन्तोको माताद, ओल ब छुतरालाई माराचिऊव, चिऊज़्यावरालाई ब चिऊव मारायो। इन निताव चिऊज़्याव मिँलाई मन्दलीनी ब पलेःज़्याव।

चाव येन दाज़्याव देमेत्रियस

11नँ डायुँलाव डानैँ, निताव माचाव येन मादाद, नदोज़्याव मिताव चाव येन दाव ज़ नैव ताके। चाव येन दाज़्याव मिँ परमेस्वरनिकाव ज़ ताज़्या। माचाव येन दाज़्यावए ते परमेस्वरलाई ब मारैँःव। 12 देमेत्रियसए उजूँनी ते प्राइँए ज़ चाव वाज़ पाँज़्यार, सोनो साचो पाँत उलिज़्याव ओक्याँनी ब रैँःज़्या। गे ब नो मिँलाई चाव ज़ थरैँद होए उजूँनी गेपाँज़्या। गे गेपाँ साचो ज़ लिज़्या लिन्या नँ ब नसैँज़्या।

तुपैन्या पाँर

13नँलाई है दान्या पाँर कुधु ज़ लिज़्या। उलिदी ब आव चिथील डामासर। 14 बुरू जाँवाक नँस दैसिद गिनडाः गिनडाः जोरैँद गिन्पाँया है डालिज़्या।

15परमेस्वरए नयुँ होलाँ जैद उईवक। आलाव ननैँराए जेरो है दींज़्यार। नलाव प्राइँ डानैँरालाई तोबो तोबोनी जेरो है यादोयो।

साःरो बाचा

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd